

Inatsisartut suleriaasianni § 33, imm. 4 naapertorlugu Naalakkersuisut matumuuna aalajangiiffigisassatut siunnersuummik matuminnga saqqummiussaqaqput:

Inatsisartut aalajangiiffigisassaattut siunnersuut Kalaallit Nunaannut inatsisissatut siunnersuummut, taarsigassarsisitsisarfiit aamma aningaasaliisarfiit aningaasaateqarnissaat aamma nakkutilliinermi piumasaqaatit pillugit. (CRR)

(Inuussutissarsiornermut, Suliffeqarnermut, Niuernermut Nunanullu Allanut Tunngasunut Naalakkersuisoq)

Tunngavik

Aningaasaqarnermik suliassaqaqfimmi Danmarkimi aamma Kalaallit Nunaanni inatsisaasuni pingaarutillit nunat tamalaani inatsisaasunik, ilanngullugit minnerunngitsumik EU-mi malittarisassianik tunngaveqarput. Inatsisissatut siunnersuutip siunertaraa aalajangersakkat piviusunngortinnissaat, taakkulu assingaat Kalaallit Nunaannut EU-tidende nr. L 176, q. 1-imi akiligassarsisitsisarfinnik aningaasaliisarfinnillu nakkutilliinikkut piumasaqaatit pillugit Europa-Parlamentip aamma Rådip peqqussutaani (EU) nr. 575/2013-mi 26. juni 2013-meersumi aalajangersakkat (kingornatigut CRR-imik taaneqartut). Peqqussut inatsimmut ilassutitut naqinneqassaaq.

Kalaallit Nunaat EU-mi ilaasortaangilaq, taamaattumillu ataani imm. 2.2-mi erseqqinnerusoq malillugu tamanna Kalaallit Nunaannut aalajangersakkat CRR-imi aalajangersakkanut assingusut atuutsinneqassappata tamanna inatsisitigut pissaq. Inatsisissatut siunnersuummut siunertaq tassaavoq nunatsinni aningaasaqarnermik suliaqarfiusumi inatsisaasunik, nakkutilliinermik aarleqquteqarnermullu piareersimatitat aqunneqarnerinik nukittorsaanissaq, taamaalillunilu aningaasat nalingisa nikerarnerini pisartunut naleqqiullugu suliaqarfiusup akiuussinnaanera pitsanngorsassallugu.

Inatsisissatut siunnersuutikkut siunertaq tassaavoq CRR-ip nassatarisaanik Danmarkimi malittarisassianut atuuttunut assingusunik Kalaallit Nunaannut malittarisassiat atuuttussat – nunatsinni pissutsinut naleqqussakkat – qulakkeernissaat. Aningaasanik akiliisinnaassutsimillu pissarsisoqarniartillugu nunat tamalaani aningaasanik niuerfiusuni nunatsinni instituttit naapittagassaannut piumasaqaataasunut naleqqiullugu tamanna pingaartuuvoq. Nunatsinni aaqqissuussaasoq nunat tamalaani inissisimaffittut inngippat nunatsinni instituttinik aarleqquteqarnermut piareersimassusilinnik taarsigassarsisitsisartut naliliinerannut sunniuteqassaaq, taamaalillunilu aningaasat taarsigassarsiat

akisunerulernissaannut ilapittuuteqarlunilu nunatsinni aningaaserivittut instituttinut, unammillersinnaasutut piunasaqaatitalinnik suliffeqarfinnut angerlarsimaffiusunullu aningaasaliinermik neqerooruteqarsinnaasunut tatiginnissutsimik nukittorsaassaaq.

Inatsisissatut siunnersuutip imarisai:

CRR-imi aalajangersakkat Kalaallit Nunaannut atuuttuulernissaat inatsisissatut siunnersuutip nassataraa. Taamaalillutik peqqussummi aalajangersakkat danskit inatsisaanni allagaasunut allanngortillugit allanneqassanngillat, inatsimmulli ilanngussatut ilaatinneqassallutik.

Taamaalilluni CRR-imut tunngatillugu EU-p sinneratulli Kalaallit Nunaanni aningaasaqarnermik sulialittut instituttinut assigiinnik malittarisassiaqarnera qulakkeerneqarpoq. Kalaallit Nunaanni aningaasaqarnermik sulialittut instituttit assersuussinnaasamik inatsisitigut tunngaveqarnissaannik tamanna kinguneqassaaq, taamaalilluni Kalaallit Nunaanni inatsisaasut tamanik takusaqarfiunerulerlutillu nunarsuarmut avatangiisumut ilisarnartunngortinneqarmata aningaasaliinermut akilersinnaassutsimullu attaveqarnissaaq oqinnerulissaaq.

Aningaaseriviit aningaasatigut tunngavigisaannik naatsorsuinerit, aningaasatigut piunasaqaataat, annertuumik peqataaffigisaat annertuunillu saqqummiussaqaarneri, akiliisinnaassusaat, piareersimassusaat paasisstissisarnermullu piunasaqaateqarfiunerini pillugit akiligassarsitsisarfinnut pingaarnertitanik piunasaqaatinut inatsisissatut siunnersuut tunngasuvoq.

Inatsisaasut atuuttut malillugit ullumikkut Kalaallit Nunaannut atuutilersitaasut aningaasaleraluni suliaqartarneq pillugu inatsimmi pissutsit taakku aallaaviatigut inatsisilersugaapput. Kalaallit Nunaanni inatsisaasut atuuttut pingaarnertut 2010 tikillugu Danmarkimi inatsisaasut qanoq issusaannut assingupput. 2010-p kingornatigut aningaasaqarnikkut artukkersimaneqarnerup malitsigisaanik danskini aningaasaqarnermik suliaqarfiusumut tatiginnissutsip isumannaarnissaa siunertaralugu Danmarkimi aningaasanut tunngasutigut inatsisaasut nukittorsaqqinnissaat siunertaralugu suliarisanik arlalinnik naammassinnittoqarsimavoq. Aningaasaqarnikkut artukkersimaneqarnermut taamatut malitseqartitsineq ullumikkut Kalaallit Nunaanni inatsisini atuuttuni ilaanngilaq, taamaattumillu aningaasaqarnermik suliaqarfiusumi malittarisassiat allat arlallit naleqqussaavigineqarnerannik inatsisissatut siunnersuut malitseqartinneqassaaq.

Kalaallit Nunaannut CRR-imik ingerlataqalersitsineq aningaasaatigisatut tunngaviusut naatsorsorneri, aningaasaatigisatut tunngaviusut piunasaqaateqarfiuneri annertuunillu peqataaffigisaqarnerit pillugit aalajangersakkat atuuttut arlallit atorunnaarsittariaqarneranik nassataqassaaq. Aningaasaatigisatut tunngaviusut naatsorsorneri pillugit kunngip peqqussutaanik atuutsitsilernikkut atorunnaarsinneqassaaq, Kalaallit Nunaanni inatsit nr.

1556, 21. december 2010-meersumi § 1-imik, aamma inatsit nr. 268, 25. marts 2014-meersumi § 1-imik (CRD IV-imut inatsit) ilaannakortumik atuutsinneqalersillugu. Tamanna ilutigalugu kingunerisitassatut CRD IV-imut inatsisip atuutsilernissaa pillugu peqqussut Inatsisartunut aalajangiussassatut siunnersuutitut oqaaseqaateqarfiusussanngorlugu saqqummiunneqassaaq. Taamaalilluni Kalaallit Nunaannut CRD IV-imik kunngip peqqussutaata atuutsitaalersup aammalu inatsisip taassuma ataatsikkut atuutsilernissaat siunertarineqarpoq. Tassunga ilanngullugu aammalu kingunerisatut UKA 2015-imi aningaasaqarnermik suliaqarfimmi inatsisinut allanut arlalinnut kunngip peqqussutaasa atuutsilernerinut tunngatillugu oqaaseqaateqarnissat pillugit Inatsisartut aalajangiussassaannut siunnersuutitik saqqummiussisoqarumaarpoq.

Aningaasaqarnikkut kingunerisinnaasai

Nunatsinni aningaasaqarnermik suliaqarfiusup inatsisilersornerata nalornissutiginerata nassatarisaanik pisortanut, inuussutissarsiorfiusumut innuttaasunullu pingaarutilinnik killup tungaanut aningaasaqarnikkut kingunerisinnaasat aarleqquteqarfiunerinik akiuisuussasutut siunnersuut nalilersorneqarpoq.

Attaveqaqatigiinneq

Soqanngilaq.

Tusarniaaneq

Siunnersuut 15. april 2015-imit 1. maj 2015-imut tusarniaassutigalugu nassiunneqarsimavoq. Tusarniaaneq siunnersuummi oqaaseqaatinik ilanngussaqaarnissamut pissutissaqartitsisimanngilaq.

Taamatut oqaaseqarnikkut akiligassarsisitsisarfinnik aningaasaliisarfinnillu aningaasaatinut piumasaqaatit aamma nakkutilliinikkut piumasaqaatit pillugit Kalaallit Nunaannut inatsisissatut siunnersuut Kalaallit Nunaannut atuutsinneqassaneranik Namminersorlutik Oqartussat akuersissuteqarnissaannik Inatsisartut aalajangiissasut Naalakkersuisut inassutigaat.

Ilanngussat:

- 1) Akiligassarsisitsisarfinnik aningaasaliisarfinnillu aningaasaatinut piumasaqaatit aamma nakkutilliinikkut piumasaqaatit pillugit Kalaallit Nunaannut Inatsisissatut siunnersuummik eqikkaaneq.
- 2) Akiligassarsisitsisarfinnik aningaasaliisarfinnillu aningaasaatinut piumasaqaatit aamma nakkutilliinikkut piumasaqaatit pillugit Kalaallit Nunaannut Inatsisissatut Siunnersuut.

3) Akiligassarsisitsisarfinnik aningaasaliisarfinnullu aningaasaatinut piumasaqaatit aamma nakkutilliinikkut piumasaqaatit pillugit Kalaallit Nunaannut Inatsisissat allanngortinnissaanut siunnersuummut tunngatillugu tusarniaanermut allakkiaq.